



UKA 2019/17

26/9-2019

Nivi Olsen

Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2019-imeersoq. (Sulinermut ilanngaat, akissarsiat Politiets Efterretningstjenestemik immikkut kukkunersuinermit ilaasut aamma soraarnerussutisiaqalernissaq siunertaralugu ileqqaakkat akileraaruserneqannginnerat)
(Aningaasaqarnermut Nunanilu Avannarlerni Suleqatigiinnermut Naalackersuisoq)
(Siullermeerinnineq)

Aallaqqaasiutigalugu naatumik oqaatigissavara, siunnersuutigineqartup ilaa, akissarsiat immikkut kukkunersuinerit ataanni Politiets Efterretningstjenestemit akissarsiaritineqartut akileraaruteqaataajunnaarnissaannut tunngasoq, Demokraatinit taparserneqarmat.

Aammattaaq siunnersuutip ilaa soraarnerussutisiaqalernissaq siunertaralugu ileqqaakkanut tunngasoq taparserparput.

Siunnersuutilli ilaa sulinermit ilanngaammut tunngassuteqartoq ima oqaaseqarfigerusupparput:

Siullermik uatsinnut pingaaruteqarpoq erseqqissassallugu sulinerup akilersinnaanerunissaa Demokraatinit ukiorpassuarni sulissutigineqarsimammat. Qangalimi isumaqarpugut suliffeqarnerup ikiorsiissutinillu isumalluuteqarnerup assigiinngisutaat annikippallaarujussuortoq.

Tamannalu tunngavigalugu aamma isumaqartuarsimavugut sulinermit ilanngaateqartitsinissaq isumassarsiatialaasoq, aamma tamannarpiaq pillugu siunnersuummik siullermeerinnittussanngorluta killiffigisarput naammagisimaarparput.

Siunnersuutigineqartoq soqannginnermit ajunnginnerungaatsiarpoq, naammaqqajannngilarli. Taamaammat neriutigaarput inaarutaasumik akuersissutigineqannginnerani allannguuteqarfiujumaartoq.

Siunnersuummut tunngatillugu ajornartorsiut angisooq teknikkimut tunngassuteqarpoq, eqqunneqarnissaali Naalackersuisut IT-kkut aaqqissuussinermikkut pitsaanagerusumik nakkutiginnilernissaannut utaaqqissunneqassanersoq isumaliutigilluinnartariaqarparput. Demokraatit isumaqarput inuit amerlanerusunik aningaasaateqalersimanertik qaammatit tamaasa malugisinnaasariaqaraat. Ima paasillugu, akissarsinermi takuneqarsinnaasariaqarpoq aningaasanik amerlanerusunik kontumut ikisisoqartoq. Siunnersuummi matumani taamaaliortoqarsinnaanngilaq, IT-kkummi ajornartorsiuteqartoqarnera pissutigalugu, aatsaat ukiup tulliani akileraarutitigut sinneqartoortunut ilanngullugu sulinermit ilanngaat tunniunneqarsinnaavoq. Demokraatit isumaqarput taama periaaseqarnerup siunnersuummut tunngavilersuutaasoq piissagaa, tassalu innuttaasut sulinissamut



kajuminnerulersinnissaat.

Taamaamat Demokraatinit Naalackersuisut kaammattussavagut IT-kkut aaqqissuussinerit piareersarnissaannut suliaq pingaarnersioqqullugu, sulinermut ilanngaat innuttaasunit ilanngaatitut qaammatit tamaasa iluaqutigineqarniassammat, imaanngitsoq matumani siunnersuutigineqartut ukiumut ataasiaannartarluni.

Demokraatit isumaqarput IT-kkut aaqqiissut piareernissaata tungaanut akileraarutitigut utertoornep avataasigut sulinermut ilanngaat tunniunneqartarnissaa, taamaasilluni innuttaasunit ajornannginnerusumik malinnaavigineqarsinnaanngorlugu. Tamanna assersuutitut qaammat Januar-mi pisinnaavoq.

Tamatuma saniatigut SIK isumaqatigaarput tusarniummut akissutimini erseqqissaatigimmagu ilanngaat qaffasinnerusariaqartoq, taamaaliornikkut sulinissaq kajungernerulersinneqassammat. Tamanna tunngavigalugu Demokraatinit oqaatigissavarput sulinermut ilanngaatit ukiumoortumik qaffakkiartuinnarnissaa immini anguniaasariaqartut.

Kiisalu isumaqarpugut sulinermut ilanngaatip innuttaasut ilaannit iluaqutigineqannginnissa pitsaasuunngitsoq. Imaattariaqanngilarmi akissarsiaqqortunerpaat, sulinerunissaminnik pingaartitsisuukkajuttut, sulinermut ilanngaat ilaqtigilluinnassanngikkaat. Taamaamat Naalackersuisut qinnuigissavagut naatsorsoqqullugu 606.000 koruuninut qummut killigititaq peerneqaraluarmat tamannut qanoq aningaasartuuteqarnerunermik kinguneqassanersoq, taamaaliornikkummi sulinermut ilanngaat innuttaasunit tamanit iluaqutigineqarsinnaanissaa qulakkeerneqassammat.

Taamatut oqaaseqarlunga siunnersuut sukumiisumik suliareqqitassanngorlugu Aningaasaqarnermut Akileraartarnermullu Ataatsimiititaliamut innersuuppara.